

## WILLIAMS, MORRIS ('Nicander ' ; 1809 - 1874), clericwr a bardd

**Enw:** Morris Williams

**Ffugenw:** Nicander

**Dyddiad geni:** 1809

**Dyddiad marw:** 1874

**Priod:** Anne Williams (née Jones)

**Plentyn:** Richard Williams

**Plentyn:** William Glunn Williams

**Plentyn:** William Morris Williams

**Rhiant:** Sarah Morris (née Jones)

**Rhiant:** William Morris

**Rhyw:** Gwryw

**Galwedigaeth:** clericwr a bardd

**Maes gweithgaredd:** Crefydd; Llenyddiaeth ac Ysgrifennu; Barddoniaeth

**Awdur:** Thomas Iorwerth Ellis

Ganwyd yng Nghaernarfon, 20 Awst 1809, mab William Morris a Sarah ei wraig (yr oedd hi'n chwaer i [Peter Jones](#), ' Pedr Fardd '); bu'n forwyn ar fferm '[Dewi Wyn](#),' a William Morris yn was i '[Robert ap Gwilym Ddu](#)'). Pan oedd ef yn blentyn symudodd y teulu (a oedd yn aelodau gyda'r Methodistiaid Calfaidd) i'r Coed Cae Bach, Llanybi, Eifionydd. Bu yn yr ysgol yn Llanystumdwy, a phrentisiwyd ef yn saer; dechreuodd brydyddu yn ieuanc, ac yn 1827 cyfansoddodd ' Awdl ar y Pedwar Mesur ar Hugain Cerdd Dafod, defnyddiau yr hon ydynt Enwau Priodol o'r Ysgrythyr Lan ... er difyrwch i hoffwyr yr Awen.' Cyfrannodd yn helaeth o draddodiad a chymdeithas lengar Eifionydd, a gwelwyd bod ynddo ddeunydd ysgolhaig. Swcrwyd ef felly i fanteisio ar gyfleusterau addysgol pellach; aeth i Ysgol y Brenin yng Nghaer, ac ymaelodi yn Rhydychen yn aelod o Goleg Iesu, Ebrill 1832. Graddiodd yn B.A. yn 1835 ag anrhydedd yn yr ail ddosbarth yn y clasuron ac yn M.A. yn 1838; urddwyd ef yn ddiakon gan esgob Caer yn 1835, ac yn offeiriad gan yr esgob Carey o Lanelwy yn Hydref 1836. Trwyddedwyd ef yn gurad i Dreffynnon, Ebrill 1836; aeth wedyn i esgobaeth Bangor, ac aildrwyddedwyd ef i Dreffynnon, Mehefin 1838. Yna daeth yn gurad Bangor a Phentir, Chwefror 1840, yn gurad Llanllechid, Ebrill 1845, ac yn gurad parhaus Amlwch (a Llanwenllwyfo), Ionawr 1847. Yn Hydref 1859 codwyd ef yn rheithor Llanrhuddlad (gyda Llanfflewin a Llanrhwydrus) a bu yno hyd ei farwolaeth, 3 Ionawr 1874. Claddwyd ef ym mynwent Llanrhuddlad; y mae coflech iddo yn yr eglwys yno, a hefyd bulpud marmor yn eglwys gadeiriol Bangor. Yn 1840 priododd ag Anne Jones o Ddinbych; bu iddynt bum merch a thri mab. O'r meibion, bu un, WILLIAM GLUNN WILLIAMS, yn brifathro ysgol Friars ym Mangor o 1879 hyd 1919; bu farw 23 Chwefror 1938 yn 87 oed; yn 1901 cyhoeddodd waith gan ei dad, *Damhegion Esop ar Gân*. Bu mab arall, WILLIAM MORRIS WILLIAMS, yn brifathro ysgol ramadeg y Bont-faen o 1875 i 1889.

Pan oedd ' Nicander ' yn Nhreffynnon, bu'n cynorthwyo yn y gwaith o ddiwygio Cymraeg y *Llyfr Gweddi Gyffredin*, ac o eisteddfod Aberffraw yn 1849 ymlaen, pan enillodd y gadair am awdl ar ' Y Greadigaeth,' bu'n flaenllaw yn y byd llenyddol,

gan ennill a beirniadu droeon yn yr eisteddfod genedlaethol. Ysgrifennodd yn helaeth i'r *Cylchgrawn Cymraeg*, gan gyfieithu *Chwedlau Esop* yn Gymraeg; cyfansoddodd hefyd lawer o emynau. Ymhlith ei gyhoeddiadau ceir *Y Flwyddyn Eglwysig*, 1843; *Dysga Fyw*, 1847; a *Dysga Farw*, 1848; sef cyfieithiadau o weithiau'r Dr. Sutton; argraffiad o *Llyfryr Homiliau*, 1847; *Y Psallwyr, neu Lyfr y Psalmiau wedi ei gyfieithu a'i gyfansoddi o'r newydd ar fesur cerdd*, 1850; argraffiad o waith '[Dafydd Ionawr](#).' 1851; a nifer o draethodau ar faterion eglwysig. Ceir hefyd yn *Adgof uwch Anghof*, 1883, ddetholiad diddorol o'i lythyrau at ei gyfaill [Ebenezer Thomas](#) ('Eben Fardd'). Yr oedd yn un o arloeswyr ' Mudiad Rhydychen ' yn esgobaeth Bangor.

## Awdur

Thomas Iorwerth Ellis, (1899 - 1970)

## Ffynonellau

*Oxford Dictionary of National Biography*

J. Jones ('Myrddin Fardd'), '[Adgof uwch Anghof.](#)' *Llythyrau lluaws o Brif Enwogion Cymru* (1883)

A. O. Evans, *A Chapter in the History of the Welsh Book of Common Prayer; or, the letters which were written preparatory to the revised edition of 1841. Annotated, with biographical sketches* (Bangor 1922)

*Y Geninen*, 1884, 1887

*Yr Haul*, 1874

cofrestri esgobaeth Bangor a Llanelwy (N.L.W.)

*Y Gwylidydd*, 1827

*Y Gwyddoniadur Cymreig* (1889–96)

## Darllen Pellach

Erthygl Wicipedia: [Morris Williams \(Nicander\)](#)

## Gweithiau

David Richards, Morris Williams (gol.), *Gwaith Dafydd Ionawr* (Dolgellau 1851)

## Dolenni Ychwanegol

VIAF: [2241845](#)

Wikidata: [Q6913946](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

